

四庫全書

集部

欽定四庫全書

集部
宗伯集卷八

詳校官中書臣沈鳳輝

侍讀臣孫球覆勘

總校官編修臣王燕緒

校對官庶子臣鄒奕孝

謄錄監生臣顧裕涇

欽定四庫全書

宗伯集卷八

明 孫繼皋 撰

誌銘

通議大夫吏部左侍郎兼翰林院侍讀學士掌詹
事府事贈禮部尚書謚文裕王公墓誌銘

吾師故吏部左侍郎兼翰林院侍讀學士掌詹事府事
東岑先生南昌王公之卒也上聞詔所司予祭予葬尋

予誥贈尚書禮部已又特予謚曰文裕於是朝廷所以
閔卹儒臣之典綦隆以備矣而獨墓中石有所請焉而
弗讐也公既葬之若干年為萬歷丙午公之子今廣西
潯州守時丈方郎南曹則以范學憲廷言狀委余曰張
上恩耀先猷以畢不孝遺責是在吾子余公甲戌所舉
士也夫孔子之葬也而公西華識之小子何人敢為地
下辱蓋逡巡謝不敏又可一歲所而始獲按狀為之誌
誌曰公諱希烈字子忠東岑號也世江西臨川人其先

有諱本淵者徙為南昌人再傳為紹肅紹肅傳竹軒公
崇禎是為公祖崇禎傳澹齋公廷望是為公父兩世皆
以公貳禮部滿祖若祖妣喻得誥贈父若妣徐得誥封
並視三品而兩親之及於封尤人子之希邁云公生有
貴徵質又奇穎七歲能為詩乃祖贈公嘗携之過隣家
指和壁間韻公應聲有敲落梅花襯筆香之句坐客嗟
異曰此今之楊億也他日必以文名天下年十七補邑
諸生又二年為嘉靖庚子舉於鄉顧不利禮部試公則

益結同志為文社相與切磋其藝學日以進而文日以高又十四年為癸丑成進士改翰林院庶吉士解館授其院編修丁巳充節使封益藩己未壬戌兩分校會試理誥勅預修永樂大典癸亥除侍讀乙丑主武試丙寅大典成賜金幣晉左春坊左諭德隆慶改元補經筵講官公次當講盟心積誠幾有所感悟所進講章因事寓規諷反覆剴切上動容聳聽丁卯主應天試是科用言者議革國子生所編四字號者而以夷於郡邑生迨放榜國

子願大誦會主司廟謁譟而前公諭以禮法且許為請
復故號譟者唯唯退遷國子監祭酒都人士惴惴懼乃
公母怒而色耶公顧無幾微第數召集之館下詔以忠
孝大節間為講明道術剖析經義款款不倦毋論諸譽
髦斌斌顧化即跼蹐輩一變而魚雅矣已已擢禮部右
侍郎兼翰林院侍讀學士俄轉左遣祀先醫疏言神農
古炎帝神聖首出而旅醫師不倫宜改正不報尋署其
部篆肅藩有營為王後者政府為關說公力持不可竟

寢卒未知會試貢舉士申補日講官秩滿賜恩贈封如制癸酉今上改元改今秩視詹府篆充世穆二廟實錄副總裁無何以穆廟實錄勞進一階食二品俸仍賜金幣甲戌副吾師少傅呂文簡公主會試時江陵子在試中意不無公乎屬公若為弗悟也者裁所呈卷信心矢筆略無所物色厥子棄弗錄其翁弗慊也為輟是科館選蓋公生平恬穆雅不欲示踔厲聲乃義所不可則又斬斬不旁奪如此於是二老人春秋高矣日夜謀請侍不

遂遽持其封公服服除為丁丑上亟召公踐故官為吉
士師而公固寢疾疾增劇遂終於家公內行淳至始侍
讀時嘗一迎其親養邸中樂也後雖違離然不以遠曠
省不以艾弛慕以故封公沒而公致毀凡四兄弟沒
事寡嫂恭甚兩弟亦前沒卵翼其猶子以植於成未中
年斷絃虛其室不更續曰吾不欲辜人處子也與人交
不言而意有餘久而使人加親所餘奉賜往往以急人
困厄行為齋遣死為殯殮若邑子徐生貴溪江孝廉茲

其著聽覩者不習世有機械事人或侵我我置弗較亦
不記為誰何寬然古長者之風焉所論撰宗歐陽文忠
溫醇典雅澤乎道德廟堂之容盛世之文也詩婉淡評
者以儼王右丞公尤注思鴻業凡朝章國典因革損益
之故靡不隱心屈首考求探索識其大者上幸思舊學
起公於家意且大用公而公逝矣易簣而言惟是上恩
未報母養不克終以為臣子恨無窮也悲夫公卒萬曆
丁丑六月二十一日距生正德辛巳十一月初十日得

年五十有七諭塋在臨川羅家山當江陵柄國初也業
好修郅而尚修名故甲戌之役雖少望猶訶公潔完無
以中也蓋公教士之詞曰正心術保皇極深乎深乎心
正而極遵而朋比消矣而臣主榮矣假令公不持服留
相天子砥柱巖廊之上士大夫陰有所風厲張氏科名
不熏灼禍亦不烈矣夫孰使公以憂去且以毀瘁朝廷
不獲賴正人之用而盡伏罪案者豈非天哉詞林於是
有兩文裕今夫強學好問之不足以盡公也而公得耦

陸詹事詹事嘗於經帷忤宰執而公乃於棘闥嘻其可
以齊耦矣為之銘銘曰

豫章之生七年可知公年甫七詠梅賦詩賦麗以新
中乃鐵石廣平往矣宛見風格南宮典校擇才而收
天臨日鑑誰為貴游寧觸貴臣敢辱公典貞心亮節
媿彼吳軼豫章之產豫章之材言升廟堂地切三台
梅則有實不以調鼎肖其芳華鴻業炳炳徵車在門
哭者在廬行服死孝蒼生其如帝憫遺德贈卹有異

考實易名華袞一字小子服義汙不至阿人思泰岱
世嘆江河公神行天公魄斯瘞追銘其幽用詔來世
貴州布政使司左參政澄齋張公暨配陸宜人合

墓誌銘

自余行服於家而參政澄齋張公亦持其母夫人服幽
憂中兩人數相對涕泣已轉相譬抑也公之服除而將
終焉則數召邑之薦紳長老為高會山水之間修香山
洛陽故事惟余亦往往而與則公忘年而暱余久矣一

日公飯客罷自言我頭岑岑者趣就卧頃之不起萬厯
庚寅十一月十日也余既哭公寢門而其葬也厥子大
受大任以墓石來屬嗟乎余安忍銘公余安忍不銘公
銘公而余之悲其又可知也按高大行攀龍狀公諱子
仁字安甫澄齋其號世為我常之無錫人勝國時有諱
居仁者居仁生顯顯生翼翼實說偽吳將迎明兵以降
邑賴以全事見宋文憲墓文中翼生籌以薦仕國朝終
禮部尚書籌生訥訥生允恭允恭生恕恕生珍珍生廷

珪廷珪生守平守平生累贈奉政大夫湖廣按察司僉事
小竹公炯公父也母袁太宜人公生而穎異甫十歲已能
咏庭中花稍長課制義即不好雕飾務稟於理嘉靖甲午
遂以儒士比應天乙卯舉鄉書丙辰落南宮試歸而屏紛
累下帷窺瀟洛諸儒先語錄充然有得蓋公志慕為正學
不獨欲以文藝知名也而公之為制義顧愈益工己未成
進士主事南京兵部當是時豐城李公為其尚書實參留
樞公所以事李公如嚴師而李公亦引公為助相與講求

民間利病朝家故實未嘗不移日問夜則公且志慕為經
濟不獨精力其職而已而會歲滿主爵者用公僉事楚之
湖南湖南故訟府又盜藪公廉訟師數十輩杖遣之庭為
清以計擒盜之劇而逸者而脫其囚之繫而寃者境內為
肅又會歲滿晉公參議蜀藩於是有九絲之役公贊其決
身為監遂以其巢平其都御史疏公功褒然舉首而公無
所報謝也客或說公公笑曰夫使舉者為張安世而見舉
者為叔向不可乎且吾終不欲以市道交無何果中公以

他事公弗辯拂衣東下其後蜀復有征軍興大窘然至公故所轄累累積困也後都御史曾公具白狀上乃置中者言賜白金獎公前勞下補僉事遼陽公至晝夜調兵食宣朝廷恩德過行間士甚厚士得宿飽人人呼萬歲尋移僉浙嘉湖嘉湖俗侈靡公帥以儉俗恣橫公繩以三尺蓋豪右凜凜若負霜雪而閭左若登春臺於是海塘之役塘成而上復賜金獎公勞還公少參仍巡察其地良異數也久之擢副使廣西治古田時當事者

議省官大裁巡守而古田在裁中公即家遲銓改凡三
歲拜浙之金衢之命浙當兵變之後士驕而惰公搜廩
蒐伍剔其老羸者而簡壯健者以時訓練具有程約伍
無偽占廩無虛糜屹然一軍寇不敢窺則擢公參政貴
州公愀然曰夫輕萬里游而忘八旬慈白耶是曳裾叱
馭為烈而舞斑御輿不得言孝也吾休矣不能扞茲遠
藩而上章致其仕公宦輒驅馳幾三十年所操不離兵
刑然一切治辦著聲蹟世以此推公果嫻於經濟也而

中間且功且罪且前且却處之無幾微介意將徑不除偃室
不入虛懷若不足獎借下士若不及世又以此多公學
力云公配陸宜人萬厯甲申六月二十四日先公卒於
金衢官舍父王國官雲竹公某母某氏也歸公而貧宜
人進寬譬既貴進規勸無傲容公遠仕太宜人皆留進
溫飽秉哲宣懿以相夫於孝忠而無斬厥祀撫二子有
立此皆女婦人所難能者若公與宜人真可謂齊德矣
公生嘉靖甲申宜人生嘉靖丁亥子男二長大受次大

任將以今年癸巳合而祔之青山祖塋之次禮也蓋余
獲侍公久私以謂公所稱於當世又不獨其學術與政
術而已長身玉立白皙美鬚髯望者以為此何難節鉞
樞衡而僅老一參知尊生寡嗜厚倫而樂善靡所不敦
固而僅迫中壽天人之際亦固有不可必哉史公之言
曰人貌榮名寧有既乎公仕而兵民以為天居而公車
牘交薦光映乎東山之下高吟暢咏與陶韋同趣公與
世不死矣以方齷齪至大官多壽而多辱者屈信脩短

何如也宜人生而共其榮歿而共其藏銘焉宜銘曰

世風日波聲利汨汨孰是矜謹施用則竭公譬大匠
尺寸規矩小役指使大運斤斧勇退早收浮雲去來
彼耄而榮漏急鐘催矧是外物我身亦幻委化須臾
何戀何患還神太虛魄則斯藏爾淑與居青山夜長
刻銘貞石以詔來禩以詔來禩視此銘懿

雲南按察司副使崑源華公墓誌銘

雲南按察司副使崑源華公卒將葬其子太學道時以

其族父參知公啓直所為狀哀而詣余泣請銘參知公
公門下士也其人恂恂篤論君子余生晚且陋雖言豈
復有重參知公然太學請甚堅余安可終讓按狀公諱
汝礪字用成崑源其別號華之先為南齊旌孝子寶家
錫之惠山其後自原泉扈汴蹕南渡復家隆亭族蕃以
雜簪紱鵠起其在興道則德昌公始肇厥基德昌生勤
勤生頴頴生治安是為公父以公貴贈奉政大夫刑部
陝西司郎中母陳累封太宜人公十歲能屬文十二能

辭家讀書禪宮所治易能旁獵左國史漢諸書掇其菁
華十八推擇邑諸生踰七年進食廩直指使者拔冠決
科試文譽藉甚顧不第迄嘉靖壬子始舉應天己未舉
南宮成進士又皆踰七年而售則公荏苒強仕矣以進
士一餉延綏軍還拜主事刑部四川司分宜敗厥子世
蕃當論罪公職其比即奮筆署曰狼貪螫毒不足為喻
法當戍士論快之陟廣東司署員外郎滿三歲考是時
贈公雖老尚健無恙與太宜人皆被封有詔公慮囚四

川未行持贈公訃奔還行服服除仍故官浙江司公既
追痛贈公不勝風木之悲而又內念太宜人迫景光桑
榆尋請告歸侍閱二歲強起補陝西司郎中適三法曹
會勘省臺臣大獄公復從衆中掀髯抗議一稟於法尚
書為倚重主爵者習公風采謀以內秩處公而公自以
無勞遇恩贈公進今贈太宜人進今號於臣子分足矣
不當覬非次會又邁客難日夜虞太宜人愈益急力請
外得浙江按察副使備兵溫處過家母子相勞苦重緋

垂白相映照而後慰喜可知也溫處故邊海上既到郡
忽海水暴漲壞民田廬浸淫決城郭公排有司議亟啓
下流壩殺其勢郡以得完歲大稔旁近郡下令平糶米
涌貴公獨弛禁商乃大集民得不饑公臨事察變以一
身救百姓其捷如此而獨不能庇貪墨吏引繩批根忤
臺使者指竟中蜚語論調調乃得雲南治瀾滄雲南去
家國萬里公咄咄欲毋行太宜人不可為強食齒決示
不億者公乃黽勉單車行而南省臺會疏備外計復以

公名上則猶用前郅故然主爵者雅知公為不平不以累公也而公亦自感奮不鄙夷其地庶幾為上扞疆場報大恩凡攝六道一切屬廉布誠宣示威德軍民土夷皆大感悅所以愛戴公甚於溫處矣俄而公之配楊宜人與太宜人計先後狎至公倉皇納璽書間關以奔而終天之痛又可知也於是公歸葬太宜人羊祈山與贈公合轎車不復出公為人直亮恬雅居平無疾言遽色亦不習為矜誇揚詡事其事二親雖宦游不獲奉朝

夕然手狀問眠食戒子婦以時順適其意千里一室也
贈公有弟而貧拊循之百方公拊循其遺孤亦百方太
宜人特憐愛幼女數問遺之不絕公亦數問遺之不絕
曰此吾二老人意也宗黨有緩急必為之畫邑里有所
興罷必首義曰此吾職所當辦也又何功為其鄉請於中
丞公損賦額十二三又請於水田使者築大堤以扞沮
洳之區幾化為上腴則皆公閭澤鴻烈云以故公生而
鄉人尸祝之沒而村吁巷哭也亦可以觀公平生矣公

生嘉靖癸未卒萬厯己丑余因是而嘆吏治之不振繇
揚激之道失也夫銓衡意也內而給事御史外而中丞
直指耳目也分而曹郎又分而藩臬郡縣手足也今夫
耳目淆而意眩手足無所効其持行矣他余不能知即
華公一官二十年中外不離執法詎不稱貴倨然可以
內矣胡外可以留矣胡調則意亦隨耳目而化也公之
言曰吾固兢兢者而及此殆有四病世好結納吾寡合
世好偃倮吾強項世好游談吾拙訥世好將迎吾不阿

夫公之四病古所謂貞介正直四德也假令汲黯備禁
閹鮑宣持斧鄧攸秉銓且引與同列又何病焉公自以
為病世亦以病公吾故曰失也雖然仕而其民思之為
立碑頌德居而儼然賓郡邑稱鄉先生士亦在所自樹
肯以彼易此哉余既為之誌而系以銘銘曰

金科玉條公所持緋衣豸冠公威儀碧雞金馬公驅
馳石樓雁蕩公埋碑南人吹蘆東人思公去胡為無
返期人乎不容天不遺壽仁生直乖難窺芝原縟縟

光離離千秋片石長如斯

中憲大夫陝西按察司提學副使雨亭李公墓誌

銘

公諱應祥字善徵別號雨亭李氏世吾無錫人相傳宋
忠定公後國初有元丑者饒勇略事高皇帝累戰功予
之官辭不拜居錫邑之陡門土田千畝以老李始著陡門
元丑五傳為拙逸公拙逸生繭齋公望博學工文辭邑
名卿才大夫多出其門以貢仕峽江諭峽江公生贈文

林郎浙江臨海知縣沐齋公繒配楊太孺人公之父若母也公之生也峽江公尚無恙一夕夢騎鹿而手其尾導從甚都寤而子舍報舉公峽江公私獨喜曰之兒殆其祥乎因以命名公生不數歲而峽江公卒贈公當戶產挫於役室廬燬於倭家徒四壁立陡門之業衰焉贈公則稱句讀師教授里中公從之里中已贈公教授吳閭門又從之吳閭門父子間相授受一經終不名他師然公所為文業膾炙吳人士口甲子隸博士弟子籍其年娶毛孺人孺

人吳產也公婿於毛可五年而贈公卒公喪之如禮服
除吾郡太守閩施龍崗先生以選拔公龍城書院文譽
出儕偶上癸酉舉應天丁丑成進士謁選得臨海令臨
海浙巖邑公以書生隨牒往顧不啻若素官所剗割
拊循名美政非一而其大者無若為民履畝而丈搜伏
稅為則而均之而賦清輸賦憚海倉險遠公力請於上
官得改折民間苦養馬公用帑金易馬民以休息小弱
戶困積逋逮繫無已時公每歲捐其羨代為償囹圄以

空凡此皆公精心畢力籌便利計長久真欲為山陬海
堧謀千百年之安而獨不畏強禦間有所得過豪貴人
以此得強項聲在事且六年臺薦無慮十許上僅徵拜
主事戶部而督餉越行縣延見舊民而轍下之攀戀其
可知也於是楊太孺人卒公喪之如贈公服除守故官
晉其部員外郎出而督餉楚遂擢其省按察僉事治湖
北所積贖鍰檄所司買穀備賑不秋毫潤私橐會楚饑
湖北民獨不饑轉參議陝守關內礦事起公調劑百方

陝民粗得保旦夕不至憊為礦使魚肉者公之力居多
久之再轉副使楚治驛傳俄調陝督其學前是公楚臬
入奉新太宰迎而曰君非臨海令耶淹矣調督學用此
公於吏事絕精然其雅志殊不屑也所好評薦舉子業
嘗兩掄浙闈所收皆知名士又嘗自教兒斤斤先民之
程既聞命馳傳入關毅然以興文造士為己任而旁攝
四篆吏事益蜂涌蝟集益晝而理牘宵而閱卷而精以
銷亡矣以其間出校商洛再校同州而病乃在膏肓亟

納節歸歸無何竟卒公居平恂恂無所奇至其排難解紛
萬人必往台兵譁譁以臺吏賸餉故兵使者度不可制
以屬公公畢召其隊之長來吾與汝曹約自今隊予一
大鏹聽汝剖誰賸汝者衆崩角謝陝青衿士忽加稅將
甘心稅使公奮曰是不可激激且生禍立散士稅使又
將甘心三原令公引義據正折其角卒援令其從容鎮
定多此類公為貧諸生時朱中丞峽江公門人也來撫
吳行求得公問生有言乎吾與生有言也公謹謝無有

公之居官廉毛孺人卒不能具十金殮則由其素也公之以諸生應郡試也自蘇走常不能具舟楫入而不能具晨舖公居官苦節徒步禱雨二十里外不言疲行役宿荒野惡溪瀑漲幾不保不言危則亦由其素也而於內行至淳篤每追憶二老人遺訓樸遯淚數行下一兄天弟又蚤世為植其孤女兄弟而嫠者為嫁其遺女族人而寡者歲給之廩以為恒公育黎保赤惟恐傷之則亦由其家之推也蓋公之雅言曰為學須識本來面目

病且革曰吾不愧蓋棺矣夫本來者何不媿者又何夫
非人真心哉公惟真心好修故不為名高為質行惟真
心愛百姓故不務赫赫務悃悃然公居而鄉里咸信愛
之仕而臨海民為立祠至率金買田供俎豆志勿絕嗟
乎斯可以觀公矣貌癯古鬚飄然善詩所至題其壁行
書遒勁有法所撰有常試編畫簾清斷宦游等稿藏於
家卒萬厯己亥七月十八日距生嘉靖壬寅八月初八
日得年五十有八配毛孺人繼陳孺人亦吳產用臨海

最贈封子男三墓在邑西南軍將山墓以今年壬寅十二月十九日丙午啓毛孺人之兆合焉禮也余與公同鄉書舉者知公既按狀為之誌而系以銘銘曰

世好畫龍有墨而儒孰贗孰真流風之趨公無近名矧彼功利一真肫肫所至而治秉衡執憲往校秦中天將喪文乃瘁厥躬去徵青羊來召玄鹿魄焉斯藏萬世之卜

中書舍人斗墟鄒君暨配王孺人合葬墓誌銘

中書舍人斗墟鄒君守官長安邸中而其王孺人卒於
寢君悲焉孺人卒之明年而君奉使齊魯之間以間從
孺人喪歸吳歸未六月而君亦卒則人又無不悲君者
以為君夫婦皆才而賢又皆盛年方貴不當夭而相隨
以夭也及是將葬其子弘基持所自為狀泣而謁余銘
余與君同舉鄉書交最暱余安可不銘君雖然余銘君
而余之悲其又可知也按狀君諱龍光字彥為斗墟其
號鄒氏相傳出宋龍圖待制忠公浩之後忠公從子樸

由晉陵徙無錫故今為無錫人樸八傳而入我明為桂
堂公莊莊生霜檜公普普生學古公堂堂生履坦公鉦
皆世隱德為其鄉祭酒鉦生汀州郡丞右湖公子進是
為君大父子進生寧陵令龍橋公懋昭是為君父兩公
在嘉靖中父子先後舉應天仕皆以惠德直節為聲而
鄒益大以著寧陵公配華太孺人生二丈夫子君其長
也君生而岐嶷居恒默默端坐澄然內朗汀州公絕憐
愛之稍長伸紙屬詞纚纚數千言不休甲子推擇學官

諸生隸吳郡自臺使者郡守邑令試輒最君君於時髦
籍甚矣而都試即報罷者再萬厯癸酉舉於鄉又再罷
南宮試然君弗為愠也開小樓集圖書其中遐覽勤思
修宏博之業以時治肴醴召羣從奉寧陵公次第起為
壽以順適其意寧陵公為數舉觴賓客望之比於星聚
焉庚辰成進士典在綸綍見推貴近而君不自喜曰陛
下置我鳳凰池幸甚顧安得手持黃紙身向滄洲升堂
而拜吾親乎會格於禁一切不得請望白雲憂思久之

而寧陵公之諱聞矣君奔歸則疽發於背蓋君既內恨
不得終事寧陵公椎心裂腸不勝哭而又外為寬譬以
無傷太孺人心憤懣約結宜其及也然當是時濱死者
數矣適有天幸不死服除趨朝銓舊官日引月長自以
決不死矣猝不幸賦彼悼亡疽復發竟死嗚呼其不可
知也君內行醇謹始寧陵公令應城獨君留侍汀州公
二老人二老人忘其子之不在側也而安君於家寧陵
強項景恭王親天子介弟忤其中涓被逮乃得調君傾

室中裝佐資斧絕不令寧陵公知寧陵公忘其困也而
安其遇於官割田以贍宗婦之嫠而貧者分館穀以教
姑之子之貧而不能學者其婦若子忘其貧也而安其
志節於阨窮無聊之際宗人嘗殘軀搆君君螫其毒幾
敗迨貴遇之有禮無所憎而訟者亦遂忘其嘗毒君也
而內安君坦夷忠厚施德而薄報怨皆此類本之君
天性孝友亦王孺人助之力也孺人名家女父曰太學
與春公休道母茹氏大父曰兵部司務五湖公業宗黨外

內簪紱照映名有家法故孺人幼而敏慧嫻於女誡歸而操家廩廩米鹽靡密無所不程度蓋婉孌以佐大人懽而拮据以相夫子為德於鄉而成名於時懿懌所從來矣嗚呼以君夫婦相篤而莊雖巨源不勝於千乘奉倩取憐於庭除豈有異哉而不得相守以老德則雙美數乃齋折其益不可知也君生嘉靖甲辰卒萬曆丙戌孺人生嘉靖壬寅卒萬曆乙酉墓在塘莊原以萬曆十七年正月初一日同穴而窆太孺人命也於是余為之

銘銘曰

女曰雞鳴士曰昧旦我思古人慨焉永嘆嗟爾夫婦
德則同貫人琴將亡絃乃先斷麻姑先導玉樓揮翰
長夜不曉雞鳴歷亂壽年有極壽名無算我得銘詩
彤史青汗以信來茲其永勿漫

勅封文林郎福建泉州府惠安縣知縣加按察司僉
事服色培橘劉公暨配何孺人合葬墓誌銘

余友江西參議長洲劉君弘道之僉事湖廣也而其尊

人封文林郎惠安縣知縣詔進僉事服色培植公卒於家惟是提學副使陸君擢實狀之少宰學士徐公顯卿實銘之然厝而未克葬也其後劉君起僉山東徙參江西而其母何孺人卒於解劉君以喪歸既卜吉將葬以封公來合而手所自為狀請余銘其合葬之石余於劉君同舉者再封公吾丈人行孺人視吾母於明德顯懿習矣銘惡乎辭謹按封公諱承宗字繼仁自號培植培植之號以其高王父橘泉公王父夢橘公故劉故藉嘉

定自國初有諱溥者用明醫徵隸太醫令歸而止其郡
金昌之濠居焉以故籍長洲溥生贈兵部主事資資生
傳所謂橘泉公者也傳生禮部儒士鵬鵬生會則所謂
夢橘公於是劉氏之於醫度三世矣會生炳炳娶於杜
杜腹封公七月而炳以疾夭死炳死而杜免身諦視之
子男為封公而杜乃大悲泣且泣且乳祿封公以長長
而夢橘公老健亡恙悉授封公禁方及藥論書封公性
穎慧善悟所揣摩設方往往與夢橘公懸合蓋其術一

試於大禋疫立起人貼危而諸老醫遜避以為不及即
夢橘公亦心喜孺子似我似我益試於備倭之士士環
聚疲者飲釜中汁皆能蘇僵踣提戈鋌而名在部使者
諸公間封公以此最勞書被冠服杜以此被旌而後母
子相慰藉可知也顧獨恨生不得見父歲時饗祭像而
拜拜而泣數行下低徊久之以為常極甘毳奉杜餘年
杜有兄而獨有外母而寡於我乎衣食歿於我殯然他
親交用緩急受恩無算本之好行德不獨於母氏為順

適而已事夢橘公能望指副意嘗為卜兆其夕感異夢
寤而得善地夢橘公以壽終適與倭變會倉皇斂舍無
抑痛無殺禮人尤以為難晚而劉君起家進士令惠安務
以德化終不持一錢歸惠安人至今思之徵入垣疏請
裁三服官增置行水使者東南賴其便封公之教也會
有所彈劾忤執政補外計且留侍杖履毋行而封公固
不許日夜召所善客置酒為高會雞鳴月落觴相屬不
疲曰兒強效官置老人家山甚樂大都封公好客豪舉

自其天性何孺人佐之未嘗不咄嗟辨也施與狼藉不問生產孺人未嘗不御機杼綜米鹽以儉勤補苴也舅而重闡姑而嫠居孺人未嘗不晨昏定省相成以孝敬也課其子博士家言孺人未嘗不躬潔滌灑敬其師調膏火勵之攻也而猶數獻規封公身幸用子貴釋藥囊衣繡而乘軒其務保身惜福毋忘異日又數勸封公公之為遺腹兒危哉則曷不多置媵廣支庶媵有子撫之若劉君無兩孺人之合於雞鳴膠漆之指如此此其於

封公庶幾齊齒婉德者矣封公生正德己卯卒萬曆癸
未子男三長即劉君弘道墓在寶華山之陽余惟封公
眇焉孤童耳蓋劉闕

河南開封府太康縣知縣友樵周公暨配曹孺人

合墓墓誌銘

余最嚴事故太康令周公云公宜興人也而婚吾無錫
曹氏因留止錫稱寓公而余與公隣也居平習見公古
衣冠危坐莊語高視濶步人目之迂及其遇知己慷慨
談天下事掀髯抵掌多奇計大略公即不迂顧其意殊
不可一世乃世亦竟迂公一為太康逐矣歸不十年遽
卒悲夫天且弗容而況人乎公卒之一年而孺人亦卒

於是厥子諸生天瑞等用公遺命將以其二人之喪還而葬之其鄉而手狀問墓銘於余悲夫余最嚴事公而公折輩行忘年而最暱余也而今不可復見矣余忍銘余又忍弗銘公初名之禧字子敬號友樵仕而更諱淳字還之宜興之周靡不系孝侯而公世譜獨系齊純陽侯周盤龍故當有據其後不知若干傳而為曉三公隱於醫子二長仲彬洪武初仕太醫判坐累戍河間次仲達家六陵村贅毫村子宗禮自毫村徙下裴宗禮子海

欽定四庫全書

高矣而自哺其孫活邑傳為異公亦以是慕儲終身公
幼脆弱善病然質敏強記叔孝廉有容嘗逮事靜菴先
生而親炙文成公獨曰此吾家學淵源也往稟業焉當
是時公孱然小稚子耳乃其志已不顓顓應舉決科矣
而為文固不凡年十七故大司馬嘉魚方公來宰邑拔
公童子中特見器重臺試復高等於是公再授室連斷
出而資館穀以養實主故大宗伯萬文恭公塾遂因文
恭游唐中丞門公於主賓師友之間多所切磋養日以

深而丈亦日以精遂婚於曹始居錫久之念且歸矣而
有祖祠之事於是公家祖祠在城南敬宗收族咸於是
乎在而一豪計并之公發憤曰國有社家有祠等耳可
異乎我必復之訟於官豪外螫宗人內蠱訟連歲不決
事幾敗蓋祠復而橐洗矣丁丑罷南宮試時方公開制
府雲中邊幣聘公為其子師公蹶曰此吾知己也敢以
孤遠為解遂行且行且求問山川險夷敵情忍悖與夫
兵食盈縮盡得其要領講藝之暇間與方公借箸而籌

居然石畫也方公大詫賞吾以君再閔而堪頗牧也耶
相得甚驩方公入為大司馬柄用而公乃謝歸歸而持
望山公服錫廬火公自是不作仕進想矣而會邑令固
勸駕乃以丙戌謁選得河南之太康下車樹二誓於堂
皇月朔望望闕伏令兩吏高聲唱之以為常其為政先
教化後刑罰額忠孝廉節四大字學宮而以出師表陳
情表四知傳歸去來辭分署其下表先賢子羔塚復子
禽塚牒學官諸生以時灑奠親臨祀韓烈士王節婦唯

謹街巷小兒所讀書多訛誤則市書訂句讀選耆儒充
教讀督之且令相與誦說古名賢遺事誘使嚮往卑高
賤良使有別而公乃盡法豪之噬民而持吏者邑大安
悅公略於事上官而謹於勤民未事常憂勞而臨事常
整暇旱饑公府下檄流民賑境內貸公抗之一矛遺也
而賑與貸是兩也夫其目前之不救而問異日償乎立
發粟千石賑之公府又下檄練兵而公練兵極精有謂
公多事者公笑曰彼不聞鄉者師尚詔事耶不恃兵而

恃此土城易穴耳其曷敢安汴河決而溺死人畜以數
萬計公倉皇集人徒給畚鍤疏壅決閼暢其下流水至
境平矣一日正宴客吏民相驚言寇至惶遽甚公弗為
動已愈洶洶公心知是訛坐益堅客色動數起公愈益
留客竟酒罷無寇蓋公見事捷持重老成深堅故能緩
弗弛防急弗搖衆也而獨強項直指所當非法歷階引
律爭監司有所督過當謝固弗謝卒以劾罷始望山公
好言人祿命公亦好言祿命已喪望山公又好形家者

流迨罷歸為兩家術者坐上常滿然公意指殊與術家
異布筭必參驗人事善敗以定凶吉往往奇中相宅必
欲蔭子孫為聖賢豪傑者不貴富卜也公執古守正薄
晚近稱先王毀譽榮辱不以擾其中似得諸萬文恭唐
中丞靜菴先生餘緒為多其深心遠識視宇宙內事都
無足為者則廿年老公車風塵邊徼耳目習而思慮審
矣惜哉一為令不克終竟死公初娶儲繼徐又繼為吾
無錫曹孺人孺人父曰汀州守察母王兄曰徵猷亦乙

卯舉應天者也汀州公以厥子故得公榜下曰夫夫宜興城南周氏即吾宦邵武而邵武人至今悲思宜興周靜菴先生此其後必賢乃以孺人歸孺人汀州公愛女不欲令去遠為治宅城東隅絕甘分旨擔負絡繹於路沒而屬其子歲資錢穀乏絕而孺人弗屑也曰父死之謂何又因以為利執勤累織垂四十年祠之訟為脫簪珥廬之火為拾瓦礫官之解為局篋鑰男女之婚嫁為畫奩幣補苴相助終以成夫子孝廉大節亶哲婦云公

生嘉靖己丑卒萬曆乙未得年六十有七子男四墓在鄉之善計祖塋之次合而祔焉禮也古語不云乎曲如鉤封公侯直如弦死道邊故夫強項幾於見箠折腰緣而解印所從來矣公雖坐強直早廢然去而士民擁車哭走冰雪斯又何也夫直道猶在人心哉彼剥民買聲譽奉上官而下以潤妻子雖共榮偕老方公夫婦冰花腐草矣為之銘銘曰

學不苟同文成真宗吾家道通仕不苟祿我夢若告

配食孝肅白璧不完朱絃不彈鹿門盤桓其芬如蘭水
歸木落返葬鄉郭斯丘偕樂以爾子孫永託

例劄授千戶心田馬公暨配許夫人合葬墓誌銘
余同年故別駕如臯馬君一日渡江謁余里居纍纍衰
經也余驟問君何服君泣然曰某不肖不能事親某之
先人千戶公暨吾母許夫人相隨棄養逝矣嗟乎已矣
願有以累子出所自為狀拜而請一詞誌銘其墓余謹
謝不敏君復泣然曰某不肖不能業官某之先人千戶

公暨吾母許夫人之逝也而某竟不獲徼一命以報矣
嗟乎已矣願終有以累子夫君之分誼可思而其情事
又可悲也余其敢終讓按狀千戶公者諱應禎字汝福
別號心田世揚州如臯人嘗遇詔恩以貲賜爵級得千
戶故稱之曰千戶公云公曾祖諱茂才用人才仕忠義
右衛經歷祖諱繼祖起家進士仕南京雲南道御史屯
田閩廣避逆瑾焰自免隱然厲風節父諱紳舉應天仕
寶豐令亦以病自免而歸母某寶豐令三子而公最長

公生故穎異為舉子業良苦有名矣會病羸中廢而以
其才用之家督顧一切治辦當寶豐公心初寶豐公當
朝正居官廉至無以具資斧公是時未弱冠也已自能
其家百方集若干金獨身走河洛間佐寶豐公北寶豐
公是以無虞於宦公兩弟其仲應科守諸生久弗振公
亦陰為集若干金令應例入太學季應中公所教也久
之亦弗振為應例挂秩太醫左右提挈絕不關寶豐
公知寶豐公是以無虞於家於是公自有子矣子凡五

而別駕君才公召之前勅曰吾家世有名甲乙賢書而
今絕於余乎子必勉之子必勉之母忘吾所訓勵矣君
跽受教丁卯舉應天甲戌成進士而後公喜可知也然
公務好行其德故事邑舉一士自額金外令自以意裒
民間金累百私舉者家命之曰作興南宮捷尤倍公前
後頻感謝家有負郭幸不貧毋庸也亟召主計其盡削
逋租籍悉焚債券以相娛樂母重困吾窶人佃戶恩流
惠行墟里之間林林作頌矣而其後君令會稽中讒移

壽昌又中讒左遷重慶倖未上罷而公顧弗色愠曰藉
令吾兒逢上魃法至大官孰與直道而黜父子相守老
林下樂乎召所善客來談笑移日夷然不屑也而其好
行德益甚族饑無糈者寒無襦者死無槨者咸於公乎
取邑祿捐金百佐貧民邑疫捐閒田十餘畝為澤園以
瘞邑城城捐上腴數十餘畝以築以鑿無所吝奉禁遷
奪古塚毋得占城市宋王龍圖夫人塚在公田中祭而
後敢遷若新封然則急仁騫義固公天性也大都公為

人長而無釋恭似魯恭養親極滋味似黃香推產其
弟似薛包平心率物判正爭訟似陳寔盜恥見知以德
感人似王烈晚而結社游賞留連觴咏則似白居易云
嘗一宿其鄉飲鄉人望見公眉宇為快後固匿不肯出
配許夫人故諸生珊女母范媪也甫十三歸公然已能
相公事寶豐公問疾侍湯藥無豫色順適其姑某暮景
無情容沒而含殮喪葬無違禮接娣姒無間言指機杼
督諸子學數見簪楚無溺愛臧獲若干指時其燠寒飽

饑無闕芻儉以成其勤嚴以修其慈守閨閤六十餘年
白首若賓則又似鴻光夫婦已公生正德癸酉卒萬厯
丙戌許夫人生正德癸酉卒萬厯己丑五子余惟萬年
教誨咸以卧聽延年暴酷嚴媪死訣夫獨非天性歟則
何其相繆戾焉余雅聞別駕君再中讒皆以強項故其
為壽昌視會稽治行尤烈去之日刻石頌德父老過之
有泣下者豈其以不徼一命貶孝公則稱先公兢兢清
白之誠弗暴貴意得弗驟廢意失豈其以不沾一命貶

榮則公家父子間慈與孝適相得矣而況許夫人齊德
偕老人貌榮名故有不在彼而在此者余故誌其行事
系之銘以慰其夫婦九原而舒別駕君之悲焉銘曰

胡玉弗沽有子升墀于何武銜不換文資匪銜之榮
曷換而怡父實教忠寧拙毋脂亦有賢母煌煌母儀
是曰齊德福壽攸宜沒而同藏江河帶之以妥以寧
以佑來茲後千百年考跡銘詩

上林苑監林衡署署丞魯川朱公墓誌銘

公諱汶字丈魯別號魯川吾常州靖江人也其先鳳陽
人有德四者以元進士仕揚州路總管即泰興家焉國
初吏部侍郎顥以其子良瑜渡江而來止東沙靖江於
是始有朱氏再傳至栢軒公愴愴生太學懷栢公承恩
公父也太學公故長者令長榜其名縣亭以章有德實
娶於劉生公公生英穎太學公授之春秋公即能為春
秋所師事顥門老生莫能難也年十四遂補邑博士弟
子明年晉食廩髫而青衿超冠其曹道路觀者藉藉嘆

息誰家郎君以彼其年何論明經擢桂乎然公六上有
司即不得一當會廩食久次貢禮部廷中都肄公乃得
第一其秋遂繇北太學上順天幾得雋矣而以額滿撤
去是年隆慶元年也事聞自同郡周太史而下靡弗為
扼腕公顧弗戚曰先生不見射乎夫射有及的而不必
穿札飲羽者則猶有遺技也歸而愈益發憤切磋其業
又六上有司冀終得一當而竟弗得而公後乃大傷恚
曰悲夫悲夫人其如命何且古有棄繻而入關牧豕而

登朝者此兩人非耶吾自髫而壯而艾今髮種種矣而
十餘上而不得一當吾其復何望萬厯丙戌起家謁選
人久之拜上林林衡丞非其志也然公強力一歲中猶
執訊一橫胥當之法按籍而餽宿蠹為一洗捐俸入興
修社學教之歌誦刻慮竭節欲以觀其能聲稱卓然中
貴斂手諸公文譽以為公不負丞也一日行部出意忽
忽不自得亟移疾請老江上得請卧江上甫三月卒矣
公為人謹嚴居平畏俗若緇惟恐其湮之臨事即直言

勇為無所避讓當為諸生縣令特見尊寵公以間言令
罷無名更徭六百名所省縣庸錢幾以千計宗黨有訟
賴公一言而解則公著才名上林其素所挾持也而公
惟是名不中第祿不逮養為愧其親晚幸有官乃其意
即不自得徒以親故其卒也以哭其愛弟戎幕君人琴
一痛聞者尤悲焉公卒萬厯己丑距生嘉靖戊子配江
陰貢氏賢明有聞先公八年卒蓋余聞公之娠也得之
天瑞云冬夜室中水在盆而冰冰稜起可寸許作花如

金史卷八
顯里人聚觀以為祥也必生奇子明年公生夫公挺潔
白拔葩藻幾似之矣而卒官冷局上林春風曾不再榮
何花不瘁何冰不澌天之所兆誰能違之哉然公故亦
有不死者宜銘銘曰

曷名太早何官暮年曷舉十餘而仕不再遷上林一
枝以當騰鸞弗擊弗搏惟其命然匪人也天德則大
全我懷高賢勒銘黃泉其以公傳

上林丞王公暨配胡夫人合葬墓誌銘

上林丞見巖王公卒厝而未克葬也踰四年而其配胡夫人亦卒又踰三年而厥子化醇德醇始獲啓公兆以胡夫人從而即其祖塋所謂前王之阡者合而定焉而問銘於余余生後公甚然仕而及公同朝也余之婦北而胡夫人舟相銜以行余徙而得公里為比隣余有女胡夫人愛之而以其孫來聘兩家殷勤通往來若昆友娣姒然公夫婦鴻燦純懿徹余誰知而銘者按公邑北郭王氏諱望道字懋及初號見菴中乃更見巖以其尊

人九巖公故九巖公諱表繇進士選翰林郎中南京禮部者也禮部公四子長堯衢先生立道亦繇進士選翰林為其編修次梁川公重道為序班鴻臚而又次乃為公當編修先生在時父子相繼起詞林踐華貫而公仲父五湖公業業亦魁鄉試順天後司務兵部一門之內簪纓照暎貴盛無比獨公以一青衿下帷而修諸生之業惟是父若兄以為才曰吾家青緇其幸有托乎命鴻臚公任家督而公任讀公遂以詩游唐中丞薛督學兩

先生之門兩先生亦以為才愛之試督學御史御史以
為才前後數列公高等而公弗第也升太學太學先生
才公如御史數亦列公高等而公即弗第公黯然太息
茲命也夫茲命也夫且賢書奏籍豈獨吾一家物哉會
編修先生卒禮部公哭之痛公涕泣與鴻臚公訣兄其
留侍生者而弟往送死者僂行走京師以喪歸歸則禮
部公亦已上章請老公趣具盡召所善客宛轉寬譬順
適之百方以無傷禮部公心而久之禮部公亦卒當析

產邑不幸適中倭當受軍興役公又涕泣與鴻臚公約
以其上腴予孤童明吾伯兄貧官也次以酬吾兄拮据
而後敢言弟於是田取其瘠者室廬取其僻者而役則
當其鉅者城之治戰艦長區賦傾橐佐縣官不貲絕不
欲偏苦鴻臚公而久之鴻臚公卒公仰天椎心大悲悼
曰吾今而後而乃獨稱子矣出而持門戶卵翼吾兄之
孤入而破顏色奉其母朱太夫人宛轉寬譬順適之百
方一如禮部公而太夫人顧不憚一日呼公前勅曰汝

居恒不言科第非一家物耶汝視我老矣我視汝亦髮
種種白而猶以儒衣冠侍徒令我思汝兩兄無休已時
公唯唯受教為太夫人舉八十觴遂行謁選人當外公
因請內亦序班鴻臚遂以其年齋水衡錢兩淮擁節乘
軺車間歸拜堂下而後太夫人喜可知也明年報使俄
遷丞上林所署良牧一切治辦然公日夜念太夫人老
疏請告凶問亦尋至星奔哭棺下一慟幾絕公自此且
與社榆塢栢盟矣公始配顧夫人繼乃胡夫人胡夫人

太保毘陵忠安公玄孫女也生而端慧名家禮法見而熟實佐公益公好讀書於書廡所不觀不耐視事而胡夫人操家斬斬積纖累微以佐公於勤公好行德嘗捐若干金脫宗人棄市罪負責者焚其券而胡夫人益散絲粟貧人以佐公於義公斥園囿蒔花卉樓船板輿以娛二老人而胡夫人辨色而朝翁寢門盜斧闖入身翼姑以免以佐公於孝公掃城中居舍鴻臚公避餘燹返而栖郭門外而胡夫人掇瓦礫理薪木以佐公於讓晚

而公有官私錢鏹金峻却無所受凡以洗垢剔蠹而胡
夫人嚴局鐫惟謹以佐公於潔廉又晚而公病稍弱尊
生家言焚香禮維摩冀以延年而胡夫人故習為吐納
導引指授公大要以佐公於攝公與胡夫人相篤莊雖
白首不衰其有繇也公祖贈承德郎戶部主事約齋公
冕曾祖友竹公某公卒萬厯癸未生正德丁丑胡夫人
父錦衣冠帶舍人一山公某母莊卒萬厯丁亥生正德
辛巳得年皆六十有七夫浩劫滾滾孰測其終元化苞

芑孰知其始異哉公首娠也太夫人夢佛指一兒授焉
寤而生公公為人終長者里中亦號之佛胡夫人少而
好修長而夢一媪慰之若良苦行見度矣其後海上有
曇陽之事胡夫人叩厥宗旨約略若夢卒之日若有期
會焉公夫婦豈獨明去來之因而夙悟始終之故者乎
夫此余不敢知獨其育世閼而忘丁落門而安中外肅
穆令德皆有於人間世亦足以不死矣為之銘銘曰

耦世甲子踰周而七同歸玄扃異宮而一何去何來

生何必百我最其德以爾子孫千億

湖廣長沙府瀏陽縣知縣致仕柱峯朱君墓誌銘
君諱正裕字在問初號志咸既乃更柱峯云朱之先至
元而有仕左丞相清者督漕事海上家焉則今太倉州
也左丞生都水監虎都水生樞密院判樞密生荊州刺
史源澤荊州生判簿暹判簿避兵江陰之馬沙則今靖
江縣也判簿生景景生巖巖生鴻臚序班軌鴻臚生三
子其季東陽公庶之君父也母陸君生甫三月而陸病

以卒則其繼郭寶祿祿君以長君長而特英穎日誦千
餘言十二善屬文十六應童子試年少娟好望若璧人
可念遂為其邑諸生俄而晉食廩屈其儕輩矣而君務
刻苦精攻其業所治春秋渡江而游吾梁溪孫一元長
洲陸安道兩先生之門晝夜手一編切磋究之盡得兩
先生之說諸專門老師莫能難也而君乃歸而謁其從
父參元先生參元先生為良知之學號為入室海內講
學之士往來質問殆無虛歲君從旁聞所謂玄言緒論

躍如有悟於是口耳訓詁亦且莫能盡矣而君遂以甲子舉應天君弗為喜也務刻苦專攻其業愈益甚甚於諸生時然數奇屢上春官皆不第而君亦弗為愠攜其婦劉擊鮮烹肥佐二老人懽延師盛供帳課其二子諸生肇啓肇修者讀白首在堂青衿在庭而君自以孝廉在公車年且未艾也無何劉一疾死二子相繼夭於瘞冢婦秦亦夭君獨持其最少子泣二老人持君泣則為君取繼於江陰亦劉也劉來無何為甲戌君自出公車

奔東陽公喪甫成葬劉亦一疾死當是時人無不為君
傷心酸鼻者而君亦不勝楚神理都盡忽忽病念以母
郭故再繼於劉攜家家江陰而身復上春官冀得一當
乃又不第尋謁選得楚之瀏陽令時丁丑三月也瀏故
山縣又楚徼其俗剽悍君至用片言折獄之久繫而疑
者片紙按盜之魁而逸者遠近藉藉稱為神明而會奉
例丈田君上下山阪蒙犯霧露身履畝而丈病繇此急
亟請致仕歸歸而拜母郭堂下幸健無恙而後喜可

知也然君病即不哀止留江陰數年還故土困床箒又三年竟以病卒君為人清簡和易出於悃悞子游之室不至曹丘之金不顧然宗黨有挂文罔憐其老未嘗不奮袂起也阮家竹林之游陳氏聚星之會怡怡觴咏移日卜夜然非儀不義未嘗不微哂示箴戒也在官不能候滿考飄然去之曰陶彭澤吾師也間居駕板輿娛太夫人曰吾不欲潘令擅風流洛渚也淳風遠韻方美前哲度越塵表而骨肉多故連蹇奇疾憂能傷人何堅弗摧

以此悲之君卒萬厯庚寅生嘉靖甲辰子肇隆以其始
繼兩劉母合而乞余文其墓石也余惟靖江於吾郡故
樂土而艱科名更數十年一捷鄉書而君以明經鏖戰
得之郡縣吏不得自移疾而君美治行直指使者請於
朝為予告榮邁異數易人所難如此而無所樹勛業以
死何也君家光祿君手具事狀猥云不當貴壽嗟乎迹
君生平豈其困風氣而生待貴壽而傳者乎銘以慰之
銘曰

天無意乎孰使崛興為吏而能天有意乎胡二暨是
乘而下壽弗登物忌多取文乃命憎匪風氣之然造
化之恒所以達觀彭殤齊稱我身泡影名於何矜君
魄止是君魂天升山縈水紆以勿騫崩復千百年縈
吾銘乎徵

勅封文林郎山東東昌府冠縣知縣鳳山張公墓
誌銘

山東副使汝州張君維新以歲甲戌與余同南宮籍奏

云於是其尊人封文林郎山東冠縣知縣鳳山公卒將
葬副使君哭授書使者令踰汴涉潁浮淮渡江以來曰
天乎孤之不獲比於人子也孤願以藩臣養吾父者數
矣而會拜今秩弗敢請也孤微靈捧表亦惟吾父故歸
而迫數舍近矣而吾父弗能待也天乎孤之不獲比於
人子也惟是墓石以累子余覽書悲焉質所為狀則其
州太守方君應選方君亦與余同籍奏應天其人備文
武質不諛且訟言非憲老學宮希睹公面也則公明德

遠矣余乃按為誌誌曰公諱從易字以時鳳山其號家
汝上無慮若干世大都閭閻不耀而自公之祖高厓公
克用始倅某州州倅生栢菴公粹娶於孫生公公生偉骨
相栢菴公竒愛之顧不幸甫三歲喪其母孫實祿於祖
母何以長栢菴公撫公泣曰是兒似李密耶微吾母誰
為吾子者課之讀輒憶試之藝文蔚紛以藻栢菴公則
又喜吾門待吾子而大日者告我矣而亡何公復不幸
喪栢菴公當是時公內不勝痛而外不勝宗人齟齬業

幾墮然公批卻導窺終亦弗為窘也而久之服除遂娶於丁為封孺人公推家秉孺人身卒業所謂清溪觀者尋推擇郡諸生試即傾其儕輩籍甚獨都肄連報罷公仰屋咄咄曰者欺吾翁乎抑吾子實當之於是副使君七歲矣而公有異祥公又居副使君所謂高厓別墅者旦暮督之峻又七歲副使君推擇州諸生又若干歲籍奏河南明年捷南宮又三年為丁丑廷對成進士而後公愉快可知也進士以次當拜令得冠時執政方好東

濕吏事以刻核為聲公戒冠令奉法循理可以為治何必威嚴哉厥後執政敗諸為刻核者名沉采滅而冠令用循良召入給事中公又戒給事官以諫為名勉旃報上恩無以二老人為念給事乃發舒効懃款上治兵大內疏謹微貴介濫賞賢書疏更輟中土饑疏賑急飛輓費不貲疏剔蠹言官坐言廢疏獎直他封駁一歲中凡十餘上間以啓事入侍文華勸講徹所賜上尊珍膳出差公予舍公引丁孺人額手謝宴而歌天保而後公愉快益

又可知也然給事竟以數言事不獲久居內擢參議湖廣而公無幾微憾惟是丁孺人溘焉捐帷漸老而單公悽愴不自得參議奔自楚所以順適公百方進名碑佐臨池進騷雅副墨佐吟進花石觴豆佐枌榆社中會而公忘亡矣參議起藩山東擢副使公一疾遽卒則辛卯六月廿又六日也邈生嘉靖癸未公為德於鄉非一自副使君成進士業置負郭百畝為義廩贍其族置塾誨族之子弟晚而屬歲祲公益捐餘錢輸幕府以風舖殍瘞

駱為橋道以濟汝洛之間義聲為滿公又善感諭人有
聞於牆出數言立解豪生截公門使酒走匿若弗聞生
醒愧悔諸為長者多此類以故公在而閭里化之沒而
填戶哭嗟乎公之明德信遠矣公配丁孺人婉慧有淑德
進士雲峯公女也蓋聞天降時雨山川出雲故世有有
用之用有不用之用公固一諸生以老澤不出其鄉然
副使君推其緒餘焚香伏蒲往往多天下大計公不用
以副使君為用用乃大光矣身食隆報享有榮名不亦

偉哉彼薛宣行縣置吏職萬年教詔怒不省此其父子
間獨何也是宜為之銘銘曰

至道之精精於治身守一處和物將自親廣成談天
黃帝下拜宮於崆峒至今勿壞公家是間實遭異人
授以其秘俾之維申我握其精棄其土苴有推而行
以雨天下不用用光大德德忘天凝天行返於芴芒
魄則藏是勿震勿毀為銘幽局以詔來祀

粵始興醫學訓科巖山譚公暨配李孺人合墓墓

誌銘

自余解宮官行服於家而粵始興譚文學先生來教諭
吾錫先生孤介寡合士也然獨昵余而余亦獨嚴先生
一日叩門拜而後言吾先子訓科公之葬也吾叔父司
徒公實銘之然而門以內筆也吾先慈之與訓科公合
也吾司徒公之門人陳博士實狀之而未有銘也其不
肖適有天幸辱在茲土敢以合葬之石請余謹謝不敢
當而先生左遷王國官吾錫之薦紳大夫與諸生席函

大者無不惜先生去以戚而先生顧私獨喜曰吾乃今得擁破甑以歸以不朽吾原下人矣詣余請益堅余又謹謝不敢當而先生留津下不去示堅決不浮慕也余其可終讓訓科公者諱大中字宗正南雄始興人境有南巖山公愛其奇勝因自號巖山云其先出宋朝散大夫文煥公之後文煥公事行具郡志中六傳為銅川授敏銅川公子懋材懋材子為壽昌丞遜壽昌公子昇昇三子其季為醫學訓科公驥驥嘗用壽昌公命越世序

而後其叔祖恭其後以司徒公太初貴卒與昇皆累贈
戶部左侍郎是為公父贈公配劉公嫡母也生母亦劉
亦皆以司徒公累贈淑人公與司徒公為同母兄而公
獨為其嫡所竒愛生不離襁褓帷帶之間以長疑不慧
然公實非不慧也或進諫曰夫人亦愛子乎父母而真
能為愛子者非愛之啣嘔美衣食也愛之以藝業使游
四方故男子生而弧矢懸其門所以志也當是時贈公
方以醫領職事蒼梧幕府蒼梧幕府者東西粵總鎮建

節其地得便宜開局曰軍門醫學盡辟所轄官醫之精
其技者更番肄其間曰上班而贈公以其邑訓科名高
見推擇為領袖於是嫡感諫者言令公提藥囊侍贈公
則盡得其方又以贈公指從他師受鍼灸八法盡其術
又旁習星卜諸小道盡其變化而後知公之果非不慧
也公既於醫精其於拔沉起痼一切隨手效遂以世業
補其邑醫學醫生十年為其訓科會贈公自幕府請老
公竟嗣其職在職又十年而公引疾歸則司徒公舉於

鄉當偕計北上公不忍其獨行也護之京師親見司徒
公成進士而公乃脩然鼓柁而南歷齊過魯涉淮浮江
度吳絕越盡攬中原上國文物聲名之盛而其先往來
蒼梧間又已極瀟湘洞庭武夷仙巖幽遐之觀一節雙
屐幾遍宇內而後知公之果能游四方為男子事也公
雖隱於醫乎乃其為人長者坦衷質行斤斤一稟繩墨
以故嗣幕府最久上下一口稱之曰賢彼其中心誠信
於士大夫非獨用醫重云而自司徒公踐華據津公之

為長者益甚有懷暮夜金要公居間公正色拒之固郡
太守約以通家禮見積數歲弗能得也即以疾請亦避
弗應曰吾老弗任醫且吾終不欲以吾故而損吾弟名
杜門檢方書寡所酬接間獨喜從田間野老沽村酒一
鮭一菜引蒲索醉古朴真率有五柳柴桑之風焉配為
李孺人諱明貞處士北隅公華女母某婦也十八而歸
公兩劉淑人嚴持新婦嗚嗚孺人事之婉孌有儀曰吾
幼所事吾父若母如此也子生而才脫簪珥佐之讀箒

勅不少借曰吾聞吾兩姑督汝叔如此也蔭而總家政
特井井墓以有田所居以有室廬內外事一切治辦曰
吾先君子遺令如此也嗟而輕萬里程就其子祿養漂
陽曰吾兒子不欲旦暮背舍我如此也而其後蒙詔恩
有司給肉與帛榜其門曰聖孝錫類鄉里以為榮蓋自
孺人歸公而公往往有蒼梧之役孺人則代為子公沒
孺人代為父令妻壽母卓行明淑晚而丁盛朝邁異數
雖時與年會亦其純德備福所私於天厚矣公生弘治

丁巳卒嘉靖辛酉孺人生弘治己未卒萬曆丙戌子男
四次即先生所繇溧陽訓遷諭封川起諭吾錫者也余
惟道之精以治身其緒餘以治天下國家世但見司徒
公致位文昌顯名朝廷以為儒之用大而知調劑補
洩以佐燠寒慘舒侵蝕之偏公所操固性命之樞也其
鄉國但見生死肉骨比於倉公扁鵲以為克推隆贈公
之傳而不知公曠然好修澹泊寡營其所身有固儒者
之粹實也孺人德齊而壽考過之夫非公活人多不自

享脩齡大年而造物者特推其餘以畀孺人而報公於
冥冥歟然有子教三邑所造士無筭植節勵風出處具
有終始儒之用卒不為不大而活人之世澤其將益衍
以昌無疑也為之銘固宜銘曰

繫儒而醫已疾扶衰贈公之遺繫醫而儒矩蹈繩趨
以兄司徒醫以暢澤儒以傳軌振鐸起迷文學之以
有美婉德望若鹿門藏斯妥斯長彼蘭孫胡軌弗傳
胡澤弗延彌大而宣後千百年視予銘以然

醫壽官楊村呂翁墓誌銘

江陰楊村呂翁卒而其從子應鍾喪之哀曰天乎自吾父逝而吾伯父猶吾父也吾伯父不子吾弟應律以天而吾猶子也而今已矣其如何則又曰夫死生命之恒也蕃悴數之值也窀穸人之歸也金石事之永也吾其從史家乞一言以殉吾伯父地下矣齋而詣余泣請銘余雅聞呂翁為人而又悲應鍾指不敢辭呂翁者諱講字明學所居楊莊因號之楊村云呂翁非實呂姓也呂

故承氏宋迄元入我明世負江而居間有仕邑宰者自呂
翁之曾祖悛丁家難早卒子巢雲公坤薨焉孤童耳其母
周祚而之所自出呂匿焉呂拊循之有恩巢雲公矢曰生
我者呂也吾子孫世世不得復顧承氏矣遂冒呂氏巢雲
公之廢儒而醫以病痿故傳子春林公夔而醫大著春林
公娶於李生兩子為呂翁兄弟而醫又大著初呂翁髫時
巢雲公尚無恙也一日召呂翁前勅曰吾使汝兄弟儒而
偃蹇以老乎孰與醫而頡頏以名乎吾材汝審矣汝何擇

術馬呂翁跪對曰惟大父命乃亦廢儒而醫盡得巢雲公
禁方及藥論書偕其仲陽橋翁讀切磋究之他日雜出視
人病察色脈傳變相與設疑難算功效同者十九不同者
十一而後知巢雲公之材之弗爽也病者家以得呂翁
兄弟一藥而安以不得呂翁兄弟一藥而危聲價鵲起
幾擯春林公出之上而後知呂翁兄弟之名之果頡頏
也然呂翁不獨名醫而已其治人病人治而我收其功
功不必我出我治而人收其利利不必我得無乘危無

擇安曰吾聞諸先大父之與人交率意哆口不習為苛
禮踈節一言投契雖終身可也問譚說古今人成敗慷
慨感憤撲檄淚數行下人目為迂曰吾不諱迂丐貸無
所取橫逆無所較焚券拭唾曰吾師乎晚而用詔恩拜
官服歲不四三御邑令召鄉飲不肯往曰吾德不任此
仁心為質蟬蛻聲利第好讀古人書泛濫經史不專軒
岐家言好誦詩憶可千首好蓄名賢畫染諷咏展玩脩
然清遠而後知呂翁之卒未嘗以醫廢儒也蓋呂翁所

自述與應鍾所為余述者云爾而余益訪求呂翁遺事
欲盡其為人則潛德嫩行甚夥不勝書夫急知已疾而
逆之誰執不令具資斧一何篤也疾凡在死法中戒其
家勿他治他治徒損金錢乃無益又何惻也終老躑躅
衢路不休不遠卻步不暑加蓋復何質也出入必薦所
嗜於先園花開必折以獻若對若思又何孝也遇佳山
水扁舟獨往留連不忍去益何曠也逍遙待盡檢所愛
圖書且披且吟禁毋得呼佛抑何定也夫是者不獨無

廢儒又類知道也余又安能盡呂翁呂翁卒萬厯庚寅
距生正德戊寅配蔣氏繼娶李氏亦無子余考齊倉公
師慶年七十餘無子遭倉公喜方授以其書史公傳倉
公動必稱師慶然不言慶何如人也呂翁亦年七十餘
無子然有重名於時又親其從子應鍾克紹明德潤色
其業此之所托以方慶不亦幸甚無憾哉乃其為人進
於技矣余故撮而列之付應鍾納諸其幽令後世有考
焉銘曰

彭澤生輓香山自銘齊一生死逍遙醉醒呂翁慕之
垂老有述曰無胥諛世好曲筆我筆無諛贊此玄室
必銘而刊小阮之意醫術儒行合為一志以詔來茲
其兩勿媿

太學古涇華君墓誌銘

余不習華太學古涇君習其子諸生寓云寓與余同以
丁卯游於學宮采采芹藻之間相樂也余為諸生七年
用射策中科而寓一旦厭棄其業罷諸生籍又十八年

余還守先人冢浮沉里門而寓持其尊人喪未葬也哀
而詣余言誌銘事問誰狀則趙郡丞道隆郡丞嘗別駕
福州余邂逅之福州其人擇言而發擇地而蹈之非苟
為諛者狀宜信然余竟讀大都言家庭之恒節非有殊
尤絕跡於世也而又偃蹇守太學以老名不挂選人澤
不被閭左安所名不朽焉雖然公之為承德郎尚絅公
子也嫡而兄者三而公居季稱孽子矣而公不自菲薄
方迎師求友切磋經生之業十六補郡諸生十七進太

學志行醇美為倫大司成所寵異弱冠婚於秦婦翁贈
奉直公泮太翁宮保尚書端敏公也端敏參機務留中
稱貴婿矣而君不自侈汰兢兢踐繩墨為喬太宰魏大
理諸名流鉅人所進承德公且死分異諸子田廬君獨
得所謂劉園橋者地偏以瘠稱下產矣而君弗為較勤
以補瘠屹然植立于澆漓器薄之中以寧厥居晚而困
長賦稱落門矣而君亦弗為推食靡衣韋儉以補約以
卒無乏絕蓋公鬚髯如戟好面折人過似亢厲然其中

心開爽無他城府纖嗇不輕予人一錢似篤於利然顧
名義厚倫理非其有不取於其先人家法庶幾能力守
而勿墜者以余耳目所睹記華山千支林林始未嘗不
殷厚好禮後稍陵逼彼其銖兩尺寸而累之聲色酒食
博塞鬪爭而屑越之何聚弗散何盛弗衰奈何笑儉勤
曰毋庸讐禮法若極枯嗟嗟以此持家家可知矣君固
無竒行閭澤可以不朽乃其處豐履盈常有以自下窘
且老顧又若不肯下人者豈其常游天下士有所聞於

名流鉅人耶余故不辭而為之誌誌曰君諱諒字企明古涇其號承德公諱燿秩用王國官授嫡母安人過氏承德之父為聽竹公守吉聽竹之父為怡隱公宗壽實惟鵞湖始興之祖其上不具次總之南齊孝子竇儼也配秦氏君生於正德己卯卒於萬厯甲申余又為之銘銘曰

史公有言人貌榮名君貌人憎而名弗榮第考其平生孝友而勤畊是惟先民之程吾故以銘君之幽瑩

郡文學養吾堵先生暨配蘇孺人合葬墓誌銘

堵養吾先生既卒且葬之二十有三年而其配蘇孺人亦卒厥子邑諸生維藩閩南平令維垣及維屏將以月日之吉奉孺人柩啓先生兆合焉而謁誌銘於余蓋余髫而與維藩維垣兩兄弟者友也於先生乎假館朝饔而夕飧於先生乎授粢先生不以余孱稚厭棄余所以拊循如其子切劘如其友而模範又如其師乃余之幸而第也而先生不及見也即先生之子之第也而先生

亦不及見也悲夫先生夫婦明德潛懿具在事狀余得藉手墓中石舒生平之感其安敢弗力謹按先生諱鴻字鳴秋養吾其號吾無錫之堵自義興徙其先有志三者生文王王王生理理生倫倫生樂耕公岳先生父也樂耕公行古之道厲操行鄉人尊為長者配薛繼曹實禱於句曲山而生先生先生之生也樂耕公春秋五十餘高矣而先生質又敏慧樂耕公私獨喜撫而曰兒將大吾門耶華陽神告我矣六歲就外傳受章句十二習

為制舉文弱冠僦居邑城之崇安卒業焉夏不帷冬不
被攻苦食淡晝夜兀兀以為常功幾與苦行頭陀埒而
後獲以丙午成郡諸生也是時樂耕公夫婦老無恙先
生愈益奮汎濫百家言咀其英華幾一當京兆試慰二
老人意而四上應天皆報罷二老人又相繼沒先生泣
然曰天乎親弗待矣而守青衿何為乎且吾幸有子吾
休矣於是維藩兩兄弟並嶄嶄露頭角先生業為擇良
師友身又自操督之極嚴竟兩兄弟所繇立本之績學

亦嚴父力云先生少而具卓識自樂耕公好行德戶納
畝千宗親以匿徭而我以任役先生跼請曰此夫以虛
畝以賈實累者也盍洗諸戶空而累釋而後樂耕公之
於耕樂也母曹之在殯也而倭適來焚掠特慘先生哀
號籲天計無所復之則倉皇陳牲酒米蔬於庭而大署
其屏曰幸甚母燬我先骨倭遶棺大嚼去竟以不火人
謂孝感先生恂抑善下人足不肯踐公府而獨不能忍
強禦豪有假長賦魚肉人者勢張甚先生恚曰是里虎

也我必櫻之立白諸令繩以法閭井始貼席凡先生所
重然諾所謹取與燕居必衣冠終其身不習為狎游詭
浪矩矱森肅見無不嚴憚而於宗親故曲有恩意割田
以佐饗者醵金以資娶者畫山以妥葬者蓋環而家者
倚若外府人又無不親先生歸焉先生雅病啖喘病得
之哭樂耕公居平即無一日不病即不一日卧病也歲
癸酉秋頓劇遂以卒余憶是歲初夏學使者試義興余
忝諸生甲維藩兩兄弟於童子中自甲乙盛矣先生賀

余曰同志同遇蓋同載泛具區歸乎粹而遭狂飈洪濤
沸天舟且覆賴先生色定指夫椒以免悲夫余輩甫以
其夏徼先生靈以活而先生遽以其秋死耶且夫不死
湖波死牖下天未為無意先生也蘇孺人者父西澗公
良弼前母張母王孺人生十有七年而歸先生相先生
三十有二年而稱未亡人又十有五年而見其子成進
士又四年祿官解以卒孺人之相先生婉孌以奉舅姑
辛苦約束以佐讀為令妻絕甘私餘以養父母老為孝

女延師潔滌澆進衣履不以子通塞為喜愠於士言命
於官言職為哲母則孺人於先生其所以內外相成生
死不相悖者矣先生卒萬厯癸酉七月二十八日距生
為嘉靖壬午正月初六日得年五十有二葬於祖塋之
昭而孺人之合而祔也以今年丁酉十二月孫繼臯曰
曩余請業西溪之上則甚德兩先生一為王澤南先生
其人堅忍強力饒郡學宮將得貢死一為先生兩先生
皆產邑西鄙家並太湖而城居又皆在西溪皆有子延

明師納友余故皆得廁席焉然余窺堵先生外嚴而內
沉類有體用者非文士而已藉令柄事當機應猝決謀
定慮聲色不動而事集矣惜乎不一遇以死式穀似之
以昌厥施其在南平乎孺人後死二十許年睹其子之
成以報先生地下先生亦永有慰也銘曰

學以苦植行以嚴操弗逢弗庸咄嗟青袍亦既有子
蜚黃綰墨譬彼蘼蕪報乃斯食淑也道捐終焉同藏
宅斯兆斯祖宗之旁煌煌天書有來無已我誌厥跡

以詔來祀

惠泉孫隱君墓誌銘

君諱炯字季明別號惠泉君非實孫姓也故蔣氏居江陰之劉莊自其七世祖竹坡公觀徙吾無錫之湖塘居焉故遂為無錫人竹坡公生蘿月公椿蘿月公生檜軒公祐檜軒公生慕巖公世昌慕巖公生思仁公輔實後於其姑之適孫而斬者於是蒙孫姓思仁公生太學梓溪公岐娶於錢生四子長炤次耀次煥君其最少子也

世之父母往往愛最少子而君顧以生晚母愛然君生英穎雅不好弄其諸父西郊公者一見竒之以為此兒寧馨得而祗之去會他日西郊公自有子乃歸歸而父若母則皆已老矣產亦已析其上腴悉已瓜分諸長兄而二老人僅擁其餘瘠以自支給逋日起君入而低回膝間出而就外傳讀讀不丙夜不輟蔚然文儒也而即不幸二老人相繼以沒遺令授君其瘠并授君其逋當是時君孱馬一孤童諸債家執契券窘子母錢危矣邑

又中倭急軍興里胥追呼按籍而窘役益又危矣顧君弗自危也曰吾故農家子吾力農亦足以佐縣官而封殖其私何必用儒起哉所謂吳戴村者君所受瘡也荷耒耜往畊焉櫛沐風雨與僮叟分功適有天幸多歲獲以倍入而逋漸減損矣以身殉義以義終事而役弗困矣蓋自君徙吳戴而田疇墟落芄芄鬱鬱幾與湖塘之業埒君之果能用力農立厥家如此君有至性方髻亂嘗身扞梓溪公於盜弱冠而持喪毀且骨五十而慕歲

時祠祀鳴泣數行下事諸長兄猶父撫循諸長兄之孤猶子也不以讒間親不以久渝愛人尤為難君為儉至於米鹽靡密衣不四三浣弗易室廬非傾圯弗治而緩急能周人窶人佃戶以無攜其孥宗黨無瘐死於獄則皆以君故君為慎至于朝夕相戒若若在門若穿在途而事至患來即又處以鎮靜籌以理勢神情彌朗卒亦無恙夫善建者不拔善抱者不脫君振家開業良本之乎勤乃其人實卓然有以自立故足述也君居平好占

候醫藥諸書間從野老村氓卜晴雨砭疾病效驗多有
又好為吐納偃仰以時修息自詭有得然其晚而為勤
益甚外強而中乾竟以瘁終其可悲也已不竟為儒用
其才當官治民而第用之阡陌勞來僮僕殿最之間詔
書不賜爵郡國不舉徵不獲比於漢之孝弟力田而第
用捐粟振閭左旌門予冠服以老其又可悲也已君卒
萬厯己丑距生嘉靖乙未配靖江朱氏墓亦在吳戴村
君嘗以子維圻從余游余於君不為不深也銘安辭銘

金史四庫全書
卷八
曰

於斯乎徙於斯乎藏粉榆松檟鬱乎相望彼何老人
君其鄉匪瘠乃腴其以子孫永昌

邑諸生文淵談君墓誌銘

談君諱經字子常別號文淵其先汴商也宋南渡來居
無錫蓮蓉湖上入明有諱壽者用從征勞授官七品又
傳而生志廣志廣生景芳景芳生仁仁生乾是為君父
母朱氏君生而穎慧年十二通尚書能為制舉義氣又

最高君父嘗坐事當詣縣對簿君隨之入垂髮爭庭下
甚力縣令檄李卜公奇其辯問童子能屬文乎君謹對
曰能立試君書義君奮筆立就卜公乃大嘉賞事遽釋
無所問於是縣人為之語曰誰不生男即不如談居久
之君推擇縣博士弟子員故廣西按察仲山王先生與
今善化令文峯錢公者皆世所稱文章家者也先後講
藝縣之洞虛宮中從游者雲集君課其間常最稱入室
弟子君又魁然偉人當是時人無不遜避君此特芥視

一第耳即君亦內自許我固饒為之而君五試應天顧
皆報罷然君弗為沮氣乃愈益高曰蘇不敝貂卡不則
脛孰能明其璞用其策者乎且我幸壯未老終當有知
我者則亦出講藝洞虛宮中後生從游亦雲集其遠乃
有自白下與金壇溧水之間來者往往得君指南歸而
籍甚有名間舉於其鄉而君依然青衿也自此君乃視
賢能奏書真比於十佛名經矣鬱鬱銷損竟卒君雖業
儒生食貧然能資所進修脯奉其父若母旨甘又能斥

其餘婚嫁其弟若妹又能輔族人光復其先世所遺業
毋廢此皆君篤行大者然亦以此無積貲宗黨有相構
君為分別曲直各得所欲去有冤為奮白公府即致怨
不恤也蓋其剛直之節信於平日云君且卒呼弟諸生
緯與其子訣曰我才非不如人志非不如人而今已矣
我死必遺二老人憂善慰之是在吾弟忠信儉勤以持
門戶是在吾子言訖遂瞑嗟乎以君其氣身不離庠序
年不踰艾以死命止此耶其亦可悲也已君生嘉靖乙

未卒萬曆壬午子應奎葬君小嶺原而乞余銘其墓中
之石余與君同里閨而君又嘗同學為諸生又先後同
出仲山先生門余每從諸門人以春秋祠先生未嘗不
遇君俎豆間也低回久之未嘗不殷勤相勞苦而君亦
不可作矣嗟乎余不當銘君哉銘曰

君胡氣之高而命之卑僅止於斯彼胡挾持而印纍
纍而壽永綏嗟嗟談君人忌猶可天孰諒我身沒坎壈
山深水左木茂樟楠君長此安以爾孫子繁夥

華室談孺人墓誌銘

往嘉靖中少司馬中丞十山談公愷解兩粵總鎮歸老城東功名富貴一時無兩而介弟鴻臚明陽公悌韋布糲食依然寒素也邑爭言第五之名不減驃騎矣而華在南郭自封戶部海月公麟祥用計然氏言起高貲埒素封其子戶部郎中補菴公雲貴而無釋丈耒老而謝為義廩食其族人頗方之范氏父子云封公晚而得今太學次菴君露奇愛之必擇婦曰婦無必名公卿家其

人不離寒素者而可也鴻臚公娶於秦再舉而女亦奇
愛之必擇婿曰婿無必高貲其家不乏賢士大夫者而
可也於是孺人歸太學君孺人之歸太學君也而封公
業前卒嫡某安人益又前卒獨所生薛氏姑在耳孺人
所以隆薛氏姑不啻若嫡也食飲必旨甘而敬進之筐
篚筮鑰無敢或專擅而後薛氏姑乃大喜曰新婦賢幸
善事我我無虞瘁矣封公之命太學君也汝父事伯兄
而母事丘嫂孺人則亦舅事兄而姑事妯旦夕問起居

歲時上履所以事楊安人不啻若薛氏姑也而後楊安人乃亦大喜曰娣賢幸親我我無虞間矣太學君稟學戶部公所而異厥居間而歸省侍孺人未嘗不引樂羊斷機之事相激勵也太學君好招延茂異為文社切劘其業孺人未嘗不潔滌澣益膏火佐之攻也而後太學君乃亦大喜曰吾妻賢幸克匡我我無虞畫矣蓋自孺人稱太學君婦而門以內外無不賢孺人者孺人又識重見遠諳曉大義不落女婦人跼蹐閨閣見解一夕盜

斧關入勢張甚孺人不錢帛問也急扣薛氏姑寢門身
倉皇掖走以免薛氏姑且驚且定泣謂孺人而何第善
我而實生我煦煦德之矣而太學君以父戶部公故所
分授田廬降而與其子五人者齒太學君意不無鞅鞅
孺人從容言先大人不徒手起南郭乎丈夫在所自致
何齷齪計較為且微兄公君寧有今日太學君遽感悟
自此絕不以挂口故知嚮者孺人之事楊安人非獨引
分亦其中心誠不背本也而久之孺人即不予則為營

別館飾一姬侍太學君又不子又以一姬進他日果有
報後房舉子者而孺人喜可知也曰先大人其終祚君
以無遺吾姑矣親卵翼煦濡惟恐傷之疾幾殆捐橐裝
召醫巫省視卒以不敗長而督之讀斷斷如也卒以觀
其成其為門戶嗣續計長久如此此豈但相太學君為勸
學助勤比於益友而已乎於是遠近亦無不賢孺人且
以賢太學君能孝恭母兄而不墜其宗也且又以徵士
不離寒素者其女必賢而能擇人者又賢也孺人生嘉

靖辛卯卒萬曆庚寅葬孺人梅里新阡而以孺人弟太學君信余修狀令二子來乞銘夫弟也而居平不輕丐姊一錢沒而肯溢一詞乎狀宜信然余嘗厠文社暱太學君久彼其鴻懿淳爍耳而習之矣即微狀信也銘安辭銘曰

維詩二南古歌房中闕睢夢寐小星在公里巷化之俗美且同世衰教熄遐哉王風巧妬工讒索家殄宗有卓明淑惠仁以容姬子吾子曷生匪躬以幸厥先

以厚爾終諒古有聞亦德之豐鬱鬱高原於作新宮
藏斯妥斯祚滋無窮我揭以銘詔彼嚚矇

勅封孺人孫室尹氏墓誌銘

孺人尹氏都察院右僉都御史操江南畿萊陽孫公旬
繼配也公受操江命未上而母戴太孺人卒於里惟是
含殮誠信畢在孺人公奔歸且踊且號微吾妻誰代吾
子乎太孺人之服禫而孺人亦卒公即又悲泣吾妻從
吾母地下耶吾弗忘吾母忍忘吾妻於是自為傳傳孺

人而貽書繼臯誌銘其葬嗟乎教之衰也勃谿之俗成而嫖忽之歌聞矣如孺人所稱賢孝婦非乎遂為誌誌曰孺人萊士族祖諸生天麒父煌孺人腹母柳六月而煌卒生數歲柳亦卒實鞠於祖母薛慧且淑也薛憐愛之甚偃蹇其偶年十七其季父文學某察公諸生中異之以為貴人會絃再絕孺人乃來為繼入門逮事王舅姑暨其舅陵川公咸婉孌有儀而獨事姑太孺人久終其天年繼以死初太孺人失陵川公也嫠且病性又嚴

重持新婦嗃嗃鮮所當意公又淹諸生未達孺人逆色
望指調旨甘而敬進之以時奉衣襦病走醫巫間拮据
績紉累織嗇佐朝夕凡以順適太孺人懽其心抑安公
讀也而公果用丁卯舉鄉書甲戌成進士拜大行人選
入臺為御史皇華直指之使驂牡而乘驄十九在官十
一在家太孺人無離憂以孺人在也公自御史久次貳
大理以陟都御史一意宣風亮采庶幾藉太孺人餘年
報主上大恩亦以孺人在也而竟相隨以死計孺人從

公祿邸中分華而享佚月日可屈指數耳其可悲也已
孺人為懿烈非一自處妯娌逮宗黨下至里婦無所不
周睦人人自以德已損貲植諸尹親為長久毋使坐糜
勅其子必曰積德積德不專責讀書先後置二媵侍公待
之並有恩禮無醜窮無溢盈斯皆女婦人所難能者然
無大事太孺人以身相終始非獨至性亦其於經訓習
矣孺人生嘉靖缺卒萬厯壬辰蓋孺人被今稱用公
御史時詔恩與元配李孺人同贈封者也公偉望重臣

朝野傾嚮久即家拜煌煌顯號賁孺人幽潛寧一二錫
然哉臯既誌之如此而又為銘銘曰

女而士兮婦而子兮以奉姑終下而從兮以相中丞
往靖共兮嗚呼斯其為尹吉氏之封兮

華母安太君墓誌銘

安於無錫最著華又著兩家皆累高賢喬木相望所從
來久其在嘉靖中華則鴻山先生察繇翰林吉士累官
侍讀學士視南篆安則膠峰公如山亦繇吉士外遷僉

事四川地望官階畧亦相當學士先生有子太學洞菴君伯貞長而材絕憐愛之曰必婦名家女而僉事公之季太學膠陽公如石有女賢故華所自出也曰必婿名家子於是太君歸太學君太君之歸太學君也而學士先生業焚魚家居然所識拔門生故人滿天下他日擁車蓋造請鵞湖之濱者趾交錯不乏惟是飲食燕勞一切需太君取咄嗟辦太君不為難也曰婦不幸不及事吾姑錢宜人幸及事吾翁何敢不盡力學士先生課太

學君嚴所招延皆四方名士旦暮各有程而太君相以勤太學斤斤守其家微近嗇而太君相以禮宗黨有緩急歲時伏臘有贈遺問太君僮僕千指飽饑燠寒問太君不問太學君也蓋太君身不出帷帶足不離機杼而閭内外事斬焉以理絕無難太君者太君所難子乃又不妬飾宜子之妾以進而太學君有子矣幼而顧復長而督誨太君忘其非吾出也即諸子亦忘太君非所出而太君有子矣嗟乎教之熄也樛木小星之詩不歌於

房中而婦以妬敗德士以婦滅宗者豈少乎如太君不亦秉誼達識女婦而丈夫者哉吾獨嘆鄉者學士先生老矣其少子禮部君叔陽又弱冠用名進士起家當此之時太學君伏櫪未衰而其長子諸生師臯髫而妙文辭復隱然負青雲之器家方隆盛簪纓衿珮堂階映照太君一俯仰而慰意可知也久之學士先生以壽終禮部君天雖太學君父子不能俟一第相隨逝矣歲曾幾何太君一哭其翁再哭其子更哭其夫菀枯炎寂之變

躬閱親嘗而後以身殉焉太君所能為華氏世者人也
所不能為華氏世者天也其可悲也已太君歿萬厯己
丑距生嘉靖辛卯卜以今年己丑啓太學君兆合焉禮
也吾既為之誌而系以銘銘曰

不子而子以祚華氏其傳二禩沒而葬此世號皇妣
後多受祉厥祚不已

邑諸生涵虛馬君妻徐氏墓誌銘

諸生馬君希尹之妻徐氏卒而涕泣自為狀來請銘曰

吾妻江陰人也江陰之徐望於我常州之五邑而太學生璜拙翁某與其配秦實生吾妻方吾妻之在室也父若母絕憐愛之吾妻亦婉孌而承事也蓋其家嘗一受盜火著其父之身傷焉吾妻則亦自灸其臂曰以分痛也父病幾殆則早夜起而呼天曰願以不肖女之身代也於是稱為孝女而自歸於吾則以不及事吾先大夫與吾之嫡金宜人為恨所以事吾生母林與所以事其母無兩是吾妻之能順也吾之少也不能問生產吾妻

弗為意也吾竊憤不力於學而吾妻乃諫諫弗從則往
往涕泣道矣吾晝與友朋切劘文史之業而吾妻進滌
滌無闕夜而篝燈讀而身以女紅佐吾勞也吾出而試
學使者而吾妻已病然猶歸寧傍父母以安吾於試而
倖成諸生而吾妻病已篤顧猶諄諄戒我無佚廢業無
利傷行也嗟乎吾妻吾益友也二十而來歸四年而遽
棄吾以天遺形永離遺息仍喪斷絃孤雁能不悲乎今
之葬也子其幸銘之余嘗考覽載籍婦德之裨士行何

其大也故王章憤激於牛衣羊子終業於斷織相成之
效自昔而然今無論馬君所稱思之皆有事實可信即
其緝文勵行卓然將振其家聲非孺人之賢而何也孺
人生嘉靖戊午卒萬厯辛巳得年僅二十有四銘曰
相彼凡鳥雙飛並翔鳳兮鳳兮乃失其凰嗟何續矣
雞鳴之章

王母華孺人墓誌銘

華孺人者故鴻臚梁川王公重道之繼室也本鄒氏父

小涇翁泳母郭其氏華者郭卒而長於姑鄒竟乃母鄒而父岷山翁惺也華鄒皆無錫大族孺人生長其間兩家父母絕憐愛之以孺人婉慧靜莊稱其為女也逮歸於王王又大族也舅曰禮部郎九巖公兄公國史編修堯衢公其父子並踐華貫赫奕貴盛家又饒禮法孺人甫入門稱賢姑朱安人太姑唐太安人無不宜孺人孝謹稱其為婦也編修公卒官禮部公卒於家而王氏遂多事會島夷颶起有司用軍興法百方窘鴻臚公鴻臚公

捐橐應之凡以佐縣官城守而家顧承島夷火焚掠幾盡然鴻臚公無深念以孺人能譬說慰解無傷其心而又身拮据以補助之也鴻臚公卒孺人稱未亡人十六年卒睹孤之有立以孺人能教也若孺人者所以為女為婦為母之道何其備也然孺人處貴富而多憂勞之攻不出帷帟而嬰門戶之慮故未老而病痺病八年竟卒矣距其生為嘉靖癸未卒為萬曆辛巳蓋余間里中化行之事其母孝也八年於病而身抱扶臥起歿而慟

幾絕者數則孺人有子矣葬孺人前王村祖塋之次啓
鴻臚公兆合焉而手狀來請銘余安敢以不文為解乃
為銘銘曰

鄒有淑華則嫁歸於王亦繼華奉尊嫜順以下德多
有閨門化中道艱良人謝爰立孤陶母亞美崇原水
紛迓石上銘照長夜

徐孺人薛氏墓誌銘


孺人薛氏文學澄宇徐翁之配而茂才文光文瑞之母

也徐江陰大族素封丹轂所在相望而薛自觀察畏齋先生以名進士起家道德文詞宗表當世其配宜人談也實生孺人孺人生而靜婉觀察絕憐愛之曰吾女不與凡子而會徐翁少而負雋聲擇焉乃字於是孺人歸翁孺人之歸徐翁年甫十六耳而徐翁之尊人忽然捐館舍孺人相徐翁喪葬易戚一稟於禮宗黨內外嘆息譁曰毋言婦新不儉人之親徐翁於諸兄弟中最少田割其瘠者廬割其狹者而又中島夷寇藐焉一孤持門

戶苦岌岌本業幾廢孺人斥釵釧御荆布拮据操作比
於寒女一不以累徐翁而徐翁遂推擇為諸生所為文
益工聲益起則孺人左右之也徐翁數奇都試輒報罷
久之用恩例拜章服聊以自老孺人為不怡晚而二子
茂才亦少而負雋聲而喜可知也孺人則督其二子甚
具往往誠曰夫業美家傳譽歸宅相爾不聞之乎勉旃
毋過佚爾前光忘爾所自出矣而二子並以諸生高等
次第廩學宮駸乎凌雲而擢桂則亦孺人左右徐翁

成之也凡此皆孺人大者本之能明識道理自其天性
然觀察閩閩觀刑之教所從來矣孺人生嘉靖庚寅卒
萬厯丁亥二子請於其翁謀以葬孺人土瀆新阡而泣
詣余丐銘其墓中之石夫道美揚輝助流政教史氏職
也余何敢以服為解銘曰

觀察楚楚不媿為女冰食蘖茹文學厚負不媿為婦
行汲操春胡德孔良而算弗長其後將昌以為莽泐
視子瑞光



宗伯集卷八